



Pranuar / Dorezuar Punëjeto/Prodato Received/Delivery	15.03.2022	2	viti god year
Organ /Njesia Organ /Jedinica Org /Unit	Nr Prot Hi Prot Prot No	Shtojca Prilog Appendix	Sasia Kolicina Quantity
SKIMSACK	1393/2022		113



## Republika e Kosovës Republika Kosova - Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS  
NEZAVISNI NADZORNI ODBOR CIVILNE SLUŽBE KOSOVA  
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.83/2022

Këshilli i Pavarur Mbikëqyrës për Shërbimin Civil të Kosovës-Kolegji për shqyrtimin dhe vendosjen e ankesave në përbërje nga: Malsore Gashi-Bajraktari-kryetare, Eshref Shabani dhe Jeton Koca-anëtarë dhe Valentina Kaçandolli Bekteshi-Zyrtare e Lartë për Bashkëpunim Profesional në cilësinë e procesmbajtëses, kanë shqyrtuar ankesën me numër A.nr.83/2022 të datës 02.02.2022 të parashtruar nga ankuesi [redacted] me adresë [redacted] Komuna e Podujevës, në çështjen juridike "kompensim material", kundër organit të punësimit Komuna e Podujevës, duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, me datë 15.03.2022, mori këtë:

### V E N D I M

Refuzohet si e pabazuar ankesa me numër A.nr.83/2022 e datës 02.02.2022, e parashtruar nga ankuesi [redacted]

### A r s y e t i m

Ankuesi [redacted] ka qenë i punësuar në Komunën e Podujevës sipas akt emërimit të datës 03.01.2014 në vendin e punës "Zyrtarë për Gjendje Civile 4" në Sektorin e Gjendjes Civile, dhe me datë 01.12.2021 Menaxheri i Personelit merr vendimin me numër 13-118/02-0104962/21 me të cilin i përfundon marrëdhënia e punës nga data 12.12.2021 për shkak të arritjes së moshës së pensionimit, ndërsa me datë 16.12.2021 Kryetari i Komunës së Podujevës merr vendim me numër 02-114/02-0108449/21 për kompensimin e pagesës në shumë prej një (1) page mujore të njëhershme në vlerën e pagës së fundit me rastin e pensionimit.

Ankuesi [redacted] me datë 16.12.2021 parashtron ankesë tek Zyra e Personelit në Komunën e Podujevës, me pretendim ankimor për pagën përcjellëse pas pensionimit. Pasi që ankuesi nuk merr përgjigje lidhur me kërkesën e tij me datë 31.01.2022 parashtron ankesë nëpërmjet Postës së Kosovës të cilën ankesë Këshilli i Pavarur Mbikëqyrës për Shërbimin Civil të Kosovës e ka pranuar me datë 02.02.2022 me numër të protokollit 489/2022.



Këshilli i Pavarur Mbikëqyrës për Shërbimin Civil të Kosovës më datë 07.02.2022 ka dërguar kërkesën për përgjigje në ankesën e ankuesit në Komunën e Podujevës. Më datë 18.02.2022 Këshilli ka pranuar përgjigjen në ankesë nga Komuna e Podujevës me provat e bashkangjitura të lëndës.

*Kolegji për shqyrtimin e ankesave ka administruar këto prova:* Ankesa e ankuesit e datës 02.02.2022 e parashtruar në Këshillin e Pavarur Mbikëqyrës për Shërbimin Civil të Kosovës; Vendimi i datës 16.12.2021 i Kryetarit të Komunës së Podujevës; Vendimi i datës 01.12.2021 i Menaxherit të Personelit i Komunës së Podujevës; Akt emërimi i datës 03.01.2014; Urdhër Pagesa e datës 23.12.2021; Kërkesa e datës 16.12.2021 e ankuesit për kompensim si dhe përgjigja në ankesë nga organi i punësimit me shkresat e bashkangjitura të lëndës.

Kolegji për shqyrtimin e ankesave, për vendosjen e kësaj çështjeje ka shqyrtuar të gjitha shkresat e lëndës të parashtruara nga palët dhe ka vërtetuar se ankesa e ankuesit [redacted] është e pa bazua, sepse:

Kolegji për shqyrtimin e ankesave, ka shqyrtuar pretendimin ankimor të ankuesit i cili pretendon se me rastin e pensionimit punëdhënësi është i detyruar që t'ia paguaj tri paga jubilarë dhe tri paga përcjellëse me rastin e pensionimit sipas Marrëveshjes së Përgjithshme Kolektive, e i cili pretendim ankimor i ankuesit është i pabazuar, sepse për kompensimet e nëpunësve civil janë të aplikueshme dispozitat ligjore të Ligjit Nr.03/L-147 për Pagat e Nëpunësve Civil dhe aktet tjera nënligjore për zbatimin e këtij ligji dhe në bazë të këtij ligji nëpunësve civil me rastin e pensionimit ju takon kompensimi në vlerën e një page të njëhershme të pagës së fundit, e jo tri (3) pagave siç ankuesi pretendon, e kjo është e përcaktuar me dispozitat ligjore të nenit 22 paragrafi 2 nën paragrafin 2.2 të Ligjit Nr.03/L-147 për Pagat e Nëpunësve Civil që nëpunësi civil ka të drejtë të kompensohet me rastin e pensionimit dhe të dispozitave të nenit 19 paragrafit 1 dhe 2 të Rregullores Nr.33/2012 për Shtesat në Pagë dhe Kompensime të Tjera të Nëpunësve Civil, që përcakton se: *"1. Sipas Nenit 22 të Ligjit për Pagat e Nëpunësve Civilë, nëpunësi civil, që arrin moshën e pensionimit në Shërbimin Civil, gëzon të drejtën e kompensimit. 2. Nëpunësi civil, që arrin moshën e pensionimit, gëzon të drejtën e marrjes së një pagese në shumën prej një (1) page mujore të njëherëshme në vlerën e pagës së fundit"*.

Në lidhje me kërkesën e ankuesit për pagesën e shpërblimit jubilar, Kolegji për shqyrtimin e ankesave ka konstatuar që me dispozitat e nenit 21 të Rregullores Nr.33/2012 për Shtesat në Pagë dhe Kompensime të Tjera të Nëpunësve Civilë, është përcaktuar që: *"Sipas Nenit 22 të Ligjit për Pagat e Nëpunësve Civilë, nëpunësve civilë, të cilët janë në marrëdhënie të vazhdueshme pune në Shërbimin Civil iu takon një shpërblim në vlerë prej 25% të pagës mesatare në Shërbimin Civil pas çdo dhjetë (10) vjetësh pune"*.

Kolegji për shqyrtimin e ankesave ka konstatuar që ankuesi ka pasur të drejtë të parashtroj kërkesën për pagesën e shpërblimit jubilar pas arritjes së kohës *"prej dhjetë (10) vjetësh pune"* ashtu siç është përcaktuar saktë me dispozitat e nenit 21 të Rregullores Nr.33/2012 për Shtesat në Pagë dhe Kompensime të Tjera të Nëpunësve Civilë, ku është përcaktuar që: *"Sipas Nenit 22 të Ligjit për Pagat e Nëpunësve Civilë, nëpunësve civilë, të cilët janë në marrëdhënie të vazhdueshme pune në Shërbimin Civil iu takon një shpërblim në vlerë prej 25% të pagës mesatare në Shërbimin Civil pas çdo dhjetë (10) vjetësh pune"*, e që nënkupton që kjo kërkesë është paraqitur jashtë afatit ligjor, pasi që ankuesi këtë kërkesë ka pasur të drejtë të parashtroj



brenda afatit prej tridhjetë (30) ditësh nga momenti kur e ka arritur kohën „prej dhjetë (10) vjetësh pune“ pandërprerë në Komunën e Podujevës.

Kolegji për Shqyrtimin dhe Vendosjen e Ankesave, ka shqyrtuar bazën ligjore mbi të cilën janë ngritur pretendimet ankimore të ankuesit se me ligjin e punës dhe Marrëveshjes së Përgjithshme Kolektive të Kosovës sipas nenit 52 dhe 53 me rastin e pensionimit i takojnë tri paga mujore jubilarë si dhe tri paga përcjellëse dhe Kolegji ka konstatuar se, Marrëveshja e Përgjithshme Kolektive e Kosovës (MPKK) e publikuar në Gazetën Zyrtare Nr.38/2014 të datës 18.06.2014, ka hyrë në fuqi me datë 01.01.2015 dhe e njëjta sipas nenit 90 paragrafi 4 të Ligjit Nr.03/L-212 të Punës, ka qenë e zbatueshme në periudhe jo me shumë se tri (3) vjet, respektivisht deri me datë 31.12.2017. Kolegji po ashtu ka konstatuar se Oda Ekonomike e Kosovës si Partner i barabartë në Këshillin Ekonomiko Social, dhe njehërit nënshkruese e MPKK-së, me datë 15.09.2017 është tërhequr nga zbatimi i MPKK-së, dhe rrjedhimisht ka pamundësuar zbatimin e Marrëveshjes së Përgjithshme Kolektive, pas datës 31.12.2017.

Kolegji për shqyrtimin e ankesave, ka konstatuar se Kryetari i Komunës së Podujevës, me rastin e nxjerrjes së Vendimit me numër 02-114/02-0108449/21 të datës 16.12.2021 për kompensimin e pagesës në shumë prej një (1) page mujore të njehershme në vlerën e pagës së fundit me rastin e pensionimit të ankuesit është i ligjshëm dhe i drejtë sepse është nxjerre në pajtim me dispozitat ligjore të Ligjit Nr.03/L-147 për Pagat e Nëpunësve Civilë si dhe Rregullores Nr.33/2012 për Shtesat në Pagë dhe Kompensime të tjera të Nëpunësve Civilë dhe Kolegji në bazë provave të lëndës ka konstatuar se ankuesit iu është bërë pagesa në vlerë prej 440.83 Euro (katërqind e katër dhjetë Euro e tetëdhjetë e tre cent) në bazë të Urdhërpagesës të datës 23.12.2022.

**Këshillë juridike:** Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në gjykatën kompetente, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

#### Këshilli i Pavarur Mbikëqyrës për Shërbimin Civil të Kosovës

Lënda me numër A.nr.83/2022

Valentina Kaçandolli BEKTESHI

Zyrtare e lartë për bashkëpunim profesional

Malsore GASHI BAJRAKTARI

Kryetare e Kolegjit



#### Vendimi i dërgohet:

- Ankuesit
- Kryetarit të Komunës së Podujevës;
- Udhëheqësit të Personelit në Komunën e Podujevës;
- Arkivit të KPMSHCK- së.

